

J E P H T H E S,

S I V E

V O T U M,

T R A G O E D I A.

*Buchanan G*

A U C T O R E

*K.*

G E O R G I O B U C H A N A N O

S C O T O.

G L A S G U A E,

I N A E D I B U S A C A D E M I C I S,

E X C U D E B A N T R O B E R T U S E T A N D R E A S F O U L I S,

A C A D E M I A E T Y P O G R A P H I :

M. DCC. LXXV.



A D

ILLUSTRISSIMUM VIRUM,  
CAROLUM COSSAEUM,

Franciae Marescallum, ac apud Taurinos Regis Francorum  
Praefectum, in JEPHTHEN Tragoediam

P R A E F A T I O.

ABSURDAM fortasse rem facere quibusdam videbor, qui ad te, hominem ab ineunte aetate militaribus imbutum studiis, et inter arma tubasque semper versatum, munusculum hoc literarium mittam : sed ii fere hoc absurdum existimaturi sunt, qui aut harum rerum inter se consensionem, non satis animadvertant, aut tuum ingenium parum habent perspectum. Neque enim inter rei militaris et literarum studium ea est, quam plerique falso putant, discordia : sed summa potius concordia, et occulta quaedam naturae conspiratio. Quanquam enim superioribus aliquot seculis, sive hominum inertia, sive falsa quadam persuasione, divisae fuerunt hae professiones, nunquam tamen perversa imperitorum opinio tantum potuit, ut ipsae inter se veterem illam et naturalem (ut ita loquar) cognationem obliviscerentur. Omnes enim omnium aetatum imperatores, qui res praeclaras gesserunt, aut ipsi doctissimi fuerunt, aut viros doctrina illustres summo amore prosequuti sunt. Neque profecto fieri potest, ut magnus et excelsus animus, qui, neglectis rebus caducis, aeternitatis memoriam ante oculos habet propositam, non etiam memoriae et antiquitatis custodes literas amet. Neque alii fere sunt qui literas oderunt et contemnunt, quam qui, vita per ignaviam et flagitia turpiter acta,

conscientiam posteritatis reformidant: ut non minus vere quam eleganter mihi cecinisse videatur Claudianus,

‘ Gaudet enim Virtus testes sibi jungere Musas,

‘ Carmen amat quisquis carmine digna gerit.

Contra vero, qui omne suum studium in eo posuerunt, ut perfectae virtutis imaginem sibi ad imitationem proponerent,

‘ — et quae natura negavit

‘ Visibus humanis, oculis ea pectoris *baurirent*, quanta eos laetitia affectum iri putemus, si ejus, quam tantopere animo persequuntur, vivum et spirans simulacrum (ut ita dicam) nacti fuerint? Sed et praeter hanc mutuam virtutis admirationem, et naturae, quam dixi, consensionem, accedit utilitatis etiam mutuae quaedam species. Nam, ut illustrium facinorum auctor non immerito eum suspicit, quem virtutis tradendae magistrum et illustrandae artificem esse videt; et velut parentem colit, non eum, a quo hujus qua fruimur lucis brevem usuram acceperit, sed alteram illam longe diuturniorem vitam in posteritatis memoria collocatam speret: ita ille alter libenter amplectitur segetem et materiam suae gloriae sibi oblatam,

‘ — qua se quoque possit

‘ Tollere humo, victorque virum volitare per ora.

Uterque enim etsi opinione hominum imparem, pari tamen studio ex eodem fundo gloriae fructum petit. Sed haec ad omnes communiter pertinent, ‘ qui (ut ait Salustius) praeciari facinoris aut artis bonae famam quaerunt.’ Illa vero tua sunt propria, quod a primis usque adolescentiae spatiis ea fuisti in patriam caritate, in bello fortitudine, in pace temperantia et aequitate, ut omnibus qui literas colunt, tuarum virtutum exemplar edideris, quod posteritati ad imitationem proponere et possint et debeant: quod literas, Philippi Cossaei fratris tui Episcopi Constantiensis patrocinio orbatas, in diverso vitae instituto tamen fovendas ac

tuendas susceperis: quod doctissimos homines semper tecum habeas, quibuscum, etiam in medio saevissimi belli ardore,

‘ — Musisque Minervam

‘ Temperes, et Geticum modereris Apolline Martem : quod filium ita literis instituendum in pueritia cures, ut hanc tam amplam laudis et gloriae haereditatem a parente acceptam non solum tueri, sed etiam augere posset. Me autem absentem, nec ulla alia re quam literarum commendatione tibi cognitum, ita complexus es omnibus humanitatis et liberalitatis officiis, ut si quis ingenii mei sit fructus, si qua vigiliarum velut foetura, ea merito ad te redire debeat. Quod quidem adeo avide facit meus hic *JEPMTHES*, ut qui antea publicam lucem et coetus hominum reformidabat, te patrono fretus prodeat, et in spem nonnullam etiam publici favoris sese erigat. Quid enim non illis sibi speret auspiciis, quibus disciplinam militarem ad antiquae severitatis exemplum videt emendatam, et vetustam belli gloriam Galliae restitutam? cum bellica fortitudine, legum et justitiae cultum, cum summa omnium rerum licentia summam omnium rerum non modo tuam, sed etiam tuorum omnium continentiam videt conjunctam? His ego caussis impulsus, hanc meam lucubratiunculam sub tuo potissimum nomine in manus hominum exire volui. Tu vero (ut spero) hoc meum sive tuorum in me officiorum testimonium, sive meae erga te benevolentiae significationem (quae tua est humanitas, et in literas amor) boni consules. Vale. Lutetiae Parisiorum, quinto Calend. Aug. M.D.LIV.



# A R G U M E N T U M

EX LIBRO JUDICUM SUMTUM.

**J**EPHTHES Galaddi filius patre defuncto a fratribus domo pulsus est, quod negarent aequum esse ut nothus cum legitimis filiis in haereditate paterna dividenda aequaretur. Is quum ob inopiam collecta manu latrocinio viveret, ac fortitudinis magnum specimen dedisset, primum a cognatis, deinde a reliquis Hebraeis dux factus est adversus Ammonitas, qui viginti prope annorum gravissima servitute eos presserant. Profecturus igitur in expeditionem, vovit, se, si victor reverteretur, qui primus domo sua egrederetur, eum Deo sacrificaturum. Prima revertenti occurrit unica filia: eam Deo immolat.

P E R S O N A E.

ANGELUS PROLOGUS.

STORGE MATER.

IPHIS FILIA.

CHORUS INDIGENARUM PUELLARUM.

JEPHTHES IMPERATOR.

SYMMACHUS AMICUS.

SACERDOS.

NUNCIUS.

7 AP 62

J E P H T H E S,

S I V E

V O T U M,

T R A G O E D I A.

A N G E L U S   P R O L O G U S.

MAGNI tonantis huc minister aliger,  
Coelo relicto, mittor Isaci ad lares,  
Solumque promissum Isaci nepotibus,  
Solum regendis destinatum gentibus,  
Si pacta sacri intaminata foederis  
Servasset : arma sed modo quod Ammonia  
Expavit arcto servitutis sub jugo,  
Tulitque quicquid triste, crudele, asperum,  
Iratu audet victor, aut victus timet.  
Hac cladē fracta gens rebellis vix Deum  
Agnoscere patrum coepit, et nefarios  
Mentita cultus numinis ludibria  
Inspecta nosse, nota floccipendere :  
Et sero quamvis ad patrem rediit suum.  
Humana sed mens nescia modum ponere  
Rebus, secundis intumet successibus.  
Quo plura hominibus contulit bonitas Dei,  
Occoecat animos altior securitas,  
Vanoque fastu turgidos superbia  
Stimulat inanis. Qualis in dominum furit  
Equi ferocis contumax protervitas,  
Imperia paullum si remissa sentiat,  
Ac vix lupatis domitus, et calcaribus

A

Duris cruentus, redit ad officium, et suo  
Obtemperat hero : sic populus hic pervicax,  
Cervice dura, pronus in pejus, flagrum  
Si conquievit paullulum, novos deos  
Adsciscit, et se dedit aliis ritibus,  
Ignota sacra sequitur. Atque adeo parens  
Benignus animos turgidos licentia,  
Bello, fameve, pestilentive aëre  
Frangit, rebellem comprimens ferociam.  
At rursus, animi ne cadat fiducia,  
Serie malorum continenter obruta,  
Mittit prophetas, bellicos mittit duces,  
Qui servitutis liberatos asperae  
Vinculis reducant, pristinisque ritibus  
Servire cogant : arma nunc Ammonia  
Ut excitavit in rebelles, ac Dei  
Jussis relictis, impiis erroribus  
Se mancipientes. Sed modum statuens suae  
Irae propitius liberatorem dedit :  
Non e potentum quempiam numero, gravem  
Turba clientum, liberisve turgidum :  
Sed e paternis exulantem sedibus  
Jephthen, suisque fratribus spretum, satum  
Genitrice vili : ne superba gens suis  
Assignet armis quod manu gestum est Dei :  
Ut sciat et Ammon hactenus se viribus  
Non floruisse propriis, sed vindicem  
Coelestis irae. Porro ne Jephthes quoque  
Se metiatur exitu hujus praelii,  
Et intumescat insolens rebus bonis,  
Damno obruetur protinus domestico,  
Cedentque fracti contumaces spiritus.  
Etenim arma in hostes perfidos quum sumeret,  
Belli secundus si daretur exitus,

Quodcunque primum se obviam ferret sibi,  
 Promisit aris se daturum victimam.  
 Heu quanta moles imminet tibi mali,  
 Miserande! quantis obruere luctibus!  
 Ut te propinqui credulum spes gaudii  
 Fallit! Propago sola quae patriam domum  
 Tibi nata servat, prima patri se offeret,  
 Ut gratuletur prosperum armorum exitum:  
 Magnoque solvet foenore, ac jugulo luet  
 Felicitatis misera praecox gaudium.  
 Atque ecce, mater tristis egreditur domo,  
 Quam somniorum nocte tota terruit  
 Tremendus horror; nataque parenti comes,  
 Prae se ferentes mentis aegrimoniam  
 Moerore vultus, gestibus, silentio.

STORGE MATER, IPHIS FILIA.

EHEU, recenti corda palpitant metu,  
 Mens horret, haeret vox in ipsis faucibus,  
 Nec ora verbis pervium praebent iter:  
 Nocturna sic me visa miseram territant,  
 Et dira turbant inquietam insomnia,  
 Gravibusque curis pectus urunt anxium.  
 At tu nitentis summe dominator poli,  
 Averte in hostes luctuosum et funebre  
 Omen, mihique placidus et gnatae meae,  
 Quae sola spes et familiae solatium  
 Superest, senectae columen unicum meae.  
 IPH. Quin ominare cara mater laetius,  
 Vanaeque causas abjice aegritudinis:  
 Et ista mentis turbidae ludibria  
 Secura sperne, spretaque obliviscere.  
 ST. Utinam liceret: sed metus, veluti recens,

Quoties recordeor, concutit formidine  
Mentem, atque imago somnii tristissimi  
Oberrat animo : pectus horrificat timor.  
Jam cuncta passim blanda straverat quies,  
Mutumque nox induxerat silentium :  
Vidi luporum concito cursu gregem  
Rictu cruento, spumeo, rabido, unguibus  
Saevum recurvis praecipite ferri impetu  
Imbellia in pecora vidua pastoribus:  
Tum pavidi ovilis fida custodia canis  
Lupos abegit : atque ad infirmum pecus  
Trepidi timoris exanime adhuc memoria,  
Denuo reversus, e sinu timidam meo  
Agnam revulsam dente laniavit truci.  
O sol, o vaga lumina lunae,  
Pictaque tacito sidera mundo,  
Et tu nox mihi conscia curae,  
Nigris referens somnia pennis,  
Si quid natae miserae impendet,  
Si quem casum fata minantur,  
Caput hoc prius in tartara miserum  
Detrudite, dum spes ambiguae  
Alternantibus angunt curis  
Incerta suae pectora cladis.  
IPH. Cur misere animum crucias, mater,  
Luctuque tuo cumulas luctum  
Publicum, et acres renovas curas?  
Omine laeto reducem potius  
Positis questibus excipe patrem :  
Qui (nisi vano mens augurio  
Credula nimium pectora fallit)  
Spoliis aderit clarus opimis,  
Remque et laudem et decus aeternum  
Genti referens patriaeque suae.

ST. Non hunc tenorem parca mihi vitae dedit.  
 Quod tempus unquam lacrymis caruit mihi,  
 Ex quo parentis primum ab alvo prodii ?  
 Primum juventa servitutem patriae  
 Tristesque vidit hostici agminis minas,  
 Pecorumque raptus, sterile sine cultu solum,  
 Caedes, cruores, vastitatem, incendia,  
 Profana, sacra, mista. Non unquam mihi  
 Secura vitae fluxit ulla portio :  
 Ut trudit undas unda, fluctus fluctui  
 Cedit sequenti, pellitur dies die ;  
 Semper premuntur praeterita novis malis :  
 Dolor dolori, luctui est luctus comes :  
 Fratrem patremque perculit belli furor :  
 Confecta curis mater inter funera  
 Cognata senuit, perduelles perfidos  
 Armis maritus urget. His majus nefas  
 Tamen veretur animus. IPH. Immodicus timor  
 Facile sinistris adhibet auguriis fidem.  
 ST. Utinam secundis audiam rumoribus  
 Virum reversum, sospitemque exercitum,  
 Salva familia. IPH. Veniet haud dubie parens  
 Incolumis : idem bella qui suasit Deus,  
 Salvum reducet laude cumulatam nova.

## C H O R U S.

JORDANIS, vitreo gurgite qui rigas  
 Convalles virides, pascua dividens  
 Foecunda Isacidum flumine languido,  
 Et nunquam posita frigoribus coma  
 Formosum Solymae palmiferae nemus,  
 En unquam miserae candidus afferet  
 Curarum vacuae lucifer hunc diem,

Quum cernam patriam libera liberam,  
Quae nunc servitii vincula barbari  
Infelix patitur. Nobilis Isaci  
Sanguis degeneris fert domini jugum :  
Et quos nec Phariae rex tumidus plagae  
Urgens falciferis terruit axibus,  
Nec trux purpurei saevities freti  
Undarum refluxis obruit aestibus,  
Nec deserta Arabum vomeris inscia,  
Nec portenta hominum mole Cyclopia,  
Fregerunt, timidi mancipium sumus  
Ammonis. Gravius flagitium est malo,  
Sub turpi domino segne jugum pati.  
At tu summe parens, qui mare turbidum  
Componis, placidi qui maris aequora  
Cauri nubiferis flatibus excitas,  
Et terrae stabilis dura tremoribus  
Fundamenta quatīs, mobilis et poli  
Sistis praecipitem quum libuit fugam;  
Cladibus tandem satiate nostris,  
Desine irarum, propiusque fessis  
Gentis afflictāe facilis bonusque  
Consule rebus.  
Nostra si poenas meruit severas  
Culpa, si quondam tibi separatam  
Abjicis sortem, vitiis iniquus  
Si pater nostris minus obsequentes  
Deseris natos, et inexpectata  
Ante dilecti populi querelas  
Despicias ira :  
Nec tibi Syrus, neque dirus Ammon,  
Nec Phari rector tumidus minacis  
Expetat poenas, neque sit profano  
In tuis castris gladio potestas.

Ignis armatus potius trisulci  
Tu, pater, dextram jaculis tremendis,  
Vindicis flammae face contumaces  
Obruas urbes, chaos aut patentis  
Devoret terrae miseros colonos,  
Aut superfusis adoperta tellus  
Hauriat undis.

Ne ferox hostis tumeat secundis  
Insolens rebus, populusque muti  
Stipitis cultor, tua qui nefando  
Polluit ritu sacra; ne, quod ira  
Saeviit in nos tua, vertat Ammon  
In suas laudes, carie peresi  
Thure dum placat simulacra trunci,  
Teque vesano neget ore gentem  
Semper addictam tibi, se premente,  
Posse tueri.

Ah miser, quantos tibi risus iste  
Mox dabit fletus? Breve diluendum est  
Gaudium longis lacrymis: citato  
Advolat cursu levis hora: tempus,  
(Vana ni vatem species inani  
Spe fovet) tempus properat, vicissim  
Quum gravis victor mala servitutis  
Sentiet durae. Neque enim cruorem  
Usque sanctorum patiēre inultum,  
Nec tuas aras dabis exsecrandis  
Pollui sacris. Utinam supremæ  
Terminus vitæ mihi in hoc supersit,  
Patrio donec tibi sacra ritu,  
Dum tibi gratum memori canamus  
Pectore carmen.

Sed ecce, celeri nuncius properat gradu,  
Ni fallit animus, advenit ab exercitu.  
Agnosco, sic est: scire quid ferat juvat.

## N U N C I U S, C H O R U S.

SALVETE veteris Abrahami filiae,

Vereque sancti sancta progenies patris,

Isthaecne Jephthae est imperatoris domus?

An me fecellit error ambiguum viae?

CH. Et ista Jephthae domus, et haec est filia.

Sed quam reportas spem, refer, si quid vacat.

NUN. Nempe istud ipsum missus huc sum ut nunciem.

Fûsis, fugatis hostibus, victoria,

Re, laude parta, salvus est exercitus.

Haec summa. CH. Paucis plurima ut complexus es!

Audita, primum, an visa fers, edissere.

NUN. Visa, acta, vera, certa, non rumoribus

Collecta vanis affero; ut qui praelii

Pars ipse fuerim. CH. Ut gesta res est expedi.

NUN. Vobis lubenter gaudium hoc impartior.

Aurora primum luce quum rosea polum

Perfudit, Ammon segnis impatiens morae,

Equis virisque, bellicorum et curruum

Strepitu tremendo, late inundarat solum.

Jamque explicata legio peditum per suas

Stabat cohortes ferro et aëre splendida:

Turmae curules ante curvis falcibus

Ibant minaces: fuderant se in cornua

Equites utrinque: noster autem exercitus

Campi patentis ultimos colles tenens,

Non asper armis, nec paratu bellico,

Sed corda, fretus numinis fiducia,

Iraeque justae vindices animos gerens.

Ibi noster inter imperator agmina,

Praecone misso, tentat absque sanguine

Finire bellum jure et aequis legibus:

Uterque populus ut vetusti finibus

Contentus agri, ab alteris injuriam  
Vimque abstineret, rapta dominis redderet,  
Pacemque bello et certa dubiis praeferat.  
Contra superbus militum hostis copiis,  
Armisque fretus, increpat ferociter  
Praeconem, acerbis et minis calumniam  
Addit : duello se petere puro et pio  
Agros vetustos, unde quondam Ammonidas  
Expulerat armis vique proles Isaci  
Egressa terrae finibus Niloticæ.  
Quos si tenere perstet, atque injuriam  
Bello tueri praeferat, quam reddere  
Erepta per vim, vindices sibi deos  
Non defuturos aequa postulantibus :  
Sin parta per vim jure malit linquere  
Solymæa gens, et sponte cedat finibus,  
Quos limes Arnon et Jacobus terminant,  
Qua solitudo cogit agros ultima  
Jordanis usque ad lente euntis flumina,  
Aequis paratos facere pacem legibus,  
Factamque gentis utriusque commodo  
Sancte tueri. Haec praeco postquam rettulit,  
Renunciare protinus Jephthes jubet ;  
Nec se, parentes nec suos Ammonio  
Populo dedisse fraude vel vi damna : nec  
Quos repetat agros nunc, fuisse finium  
Ammonis unquam, seculis quos jam tribus  
Propago Jacobi absque controversia  
Tenuit : nec ulla facta mentio interim est  
De jure dubio, vel joco vel serio :  
Nisi forte, Chamos quæ Deus tenuit tuus,  
Tibi jure cedent ; noster autem quos Deus  
Possedit agros, deseret. Non deseret :  
Sed ut ante bello victor agros hostibus

Ademit, idem justus arbiter modo  
 Hujus secundos exitus pugnae dabit,  
 Etiam secundum jus et aequum. Ut rettulit  
 Haec praeco, rauci clangor aeris aethera  
 Pulsat, virorum clamor, armorum fragor,  
 Fremitus equorum; curruum stridor boat :  
 Coelum remugit : fracta tellus axibus  
 Gemit : recussum duplicant montes sonum.  
 Virtute et astu quisque pro se nititur :  
 Ferit, feritur : pellitur, pellit : cruor  
 Permutat amnes : nocte sub densa polum  
 Pulverea nubes occulit : numero ferox  
 Instabat Ammon, numinis fiducia  
 Et caussa nostris aequat animos justior.  
 Dum neutra cedit, urget acies utraque,  
 Ecce inter umbras pulveris, cadentium  
 Lamenta gemitusque inter, atque hortantium  
 Voces, refulsit nube diducta dies,  
 Et utrasque turmas redditus coelo fragor  
 Implevit, humilis omnium mentes pavor  
 Consternat, ense languido torpent manus,  
 Gelidumque lentos frigus artus alligat.  
 Ibi imperator voce noster maxima  
 Alacrique vultu, Te, parens rerum, dūcem,  
 Tuumque sequimur angelum. Deus, Deus  
 Inimica flammis sternit illis agmina :  
 Totusque turmis fulget aether igneis.  
 Haec vox utrumque posteaquam exercitum  
 Pervasit, amens alter in fugam ruit,  
 Pavido novatis instat alter viribus :  
 Nec his sequendi finis, aut illis fugae  
 Fuit, tenebris donec atra nubilis  
 Nobis quietem, illis latebras nox dedit.  
 CH. Cur victor ergo non reducit copias ?

# J E P H T H E S.

11

NUN. Mane, universi nondum habes belli exitum.

CH. Forsan relictis hostis instat viribus.

NUN. Si quidem resument mortui vires novas :

Namque omne robur perfidae gentis Deus

Uno coëgit demetendum praelio.

Ergo aut peremti corporum cumulis locum

In quo steterunt, obtinent, aut lurida

Fusi per agros strage pascunt vultures.

Et ne resurgat denuo bellum novum,

Multos in annos dux futuri providus

Prospexit : etiam peperit et nepotibus

Seris quietem. Victor arma Ammonium

Per omne nomen celeriter circumferens,

Bis dena muris vertit oppida dirutis :

Tectis perustis puberes dedit neci :

Vastavit agros : debiles tantum senes,

Pueri tenelli et foeminae imbelles solum

Vacuum pererrant, patriae et casum gemunt.

## C H O R U S.

O AUREI dux luminis

Sol, qui recursu praepete

Vices diurnas temperas,

Et igne flammifer vago

Partiris orbi tempora,

Post lustra tandem quattuor

Jubar beatum in liberos

Fundis nepotes Isaci.

Inauspicatos impetus

Hostis superbi dextera

Jephthaea fregit, spiritus

Ammonis acres contudit,

Et praedo praeda factus est.

Ademit, idem justus arbiter modo  
Hujus secundos exitus pugnae dabit,  
Etiam secundum jus et aequum. Ut rettulit  
Haec praeco, rauci clangor aeris aethera  
Pulsat, virorum clamor, armorum fragor,  
Fremitus equorum; curruum stridor boat :  
Coelum remugit : fracta tellus axibus  
Gemit : recussum duplicant montes sonum.  
Virtute et astu quisque pro se nititur :  
Ferit, feritur : pellitur, pellit : cruor  
Permutat amnes : nocte sub densa polum  
Pulverea nubes occulit : numero ferox  
Instabat Ammon, numinis fiducia  
Et caussa nostris aequat animos justior.  
Dum neutra cedit, urget acies utraque,  
Ecce inter umbras pulveris, cadentium  
Lamenta gemitusque inter, atque hortantium  
Voces, refulsit nube diducta dies,  
Et utrasque turmas redditus coelo fragor  
Implevit, humilis omnium mentes pavor  
Consternat, ense languido torpent manus,  
Gelidumque lentos frigus artus alligat.  
Ibi imperator voce noster maxima  
Alacrique vultu, Te, parens rerum, ducem,  
Tuumque sequimur angelum. Deus, Deus  
Inimica flammis sternit illis agmina :  
Totusque turmis fulget aether igneis.  
Haec vox utrumque posteaquam exercitum  
Pervasisit, amens alter in fugam ruit,  
Pavido novatis instat alter viribus :  
Nec his sequendi finis, aut illis fugae  
Fuit, tenebris donec atra nubilis  
Nobis quietem, illis latebras nox dedit.  
CH. Cur victor ergo non reducit copias ?

NUN. Mane, universi nondum habes belli exitum.

CH. Forsan relictis hostis instat viribus.

NUN. Si quidem resument mortui vires novas :

Namque omne robur perfidae gentis Deus

Uno coëgit demetendum praelio.

Ergo aut peremti corporum cumulis locum

In quo steterunt, obtinent, aut lurida

Fusi per agros strage pascunt vultures.

Et ne resurgat denuo bellum novum,

Multos in annos dux futuri providus

Prospexit : etiam peperit et nepotibus

Seris quietem. Victor arma Ammonium

Per omne nomen celeriter circumferens,

Bis dena muris vertit oppida dirutis :

Tectis perustis puberes dedit neci :

Vastavit agros : debiles tantum senes,

Pueri tenelli et foeminae imbelles solum

Vacuum pererrant, patriae et casum gemunt.

## C H O R U S.

O AUREI dux luminis

Sol, qui recurso praepete

Vices diurnas temperas,

Et igne flammifer vago

Partiris orbi tempora,

Post lustra tandem quattuor

Jubar beatum in liberos

Fundis nepotes Isaci.

Inauspicatos impetus

Hostis superbi dextera

Jephthaea fregit, spiritus

Ammonis acres contudit,

Et praedo praeda factus est.

Nec tela Scythico profuit  
Pennata nervo spargere,  
Rapax nec axis impetus,  
Minax recurvis falcibus,  
Nec vis equorum, aut fortium  
Densae phalanges militum,  
Premente texerunt Deo.  
Jamjam discite perfidi,  
Jamjam agnoscite : non lapis,  
Non lignum Deus est : neque  
Quod vel sculpsit artifex  
Caelo dextera ferreo,  
Vel plastes facili manu  
Finxit, vultum hominis luto  
Mentitus madido : Deus  
Noster arduus aetheris  
Arces incolit igneas,  
Et rerum sator et salus,  
Majestate sua potens,  
Nec cerni facilis, neque  
Mortali docilis manu  
Certam ducere imaginem.  
Vecordem ille superbiam  
Regum frenat, et impia  
Vota et spes nimias malum  
Justus ducit ad exitum.  
Ille innoxia pectora  
Saevis pressa doloribus  
Praesenti auxilio levat :  
Et de pulvere pauperem,  
Et custodem olidi gregis  
Sceptra attollit ad aurea,  
Pastorum diademate  
Ornans tempora regio.

Hunc unum Dominum et Deum  
Terrae daedala machina,  
Sub quocunque jacet die,  
Agnoscat, colat, atque amet :  
Et quam sol oriens novis  
Subjectam radiis ferit,  
Et quam sub medio die  
Incendit propioribus  
Flammis : quique bibit Tagum  
Fulvo gurgite nobilem,  
Et qui perpetua nive  
Damnatas habitant plagas.  
Eia Hebraides, aureis  
Comtae colla monilibus,  
Perfusa ambrosiae coma  
Suave fragret odoribus.  
Eia Hebraides, Indicis  
Comtae tempora gemmulis,  
Terram multicoloribus  
Late spargite floribus.  
Cessant tinnula cymbala,  
Cessant nablia cum lyra,  
Victori Domino novum  
Carmen dicere ? tibiae  
Cessat multiforae sonus ?  
Quis terram pede libero  
Plaudit ? mollibus et choris,  
Festo laetus et otio  
Curas diluit asperas ?  
Festas victima dux gregis  
Aras imbuat : Arabis  
Suaveolentia nubila  
Ignis halet odoribus.  
Et tu progenies ducis,

Magni spes generis, cape  
 Cultus, filia, splendidos,  
 Et patrem reducem piis  
 Laeta amplectere brachiis.  
 Jamjam purpureos sinus,  
 Iphi, assume, retortulum  
 Jam cirrum cohibe : ferit  
 Aures en fremitus virum :  
 Ipse est, ipse parens adest.

## J E P H T H E S.

REGNATOR orbis, unus et verus Deus,  
 Solumque numen propitium, pollens, potens,  
 Idem severus ultor, et clemens pater,  
 Tuis tremendus et severus hostibus,  
 Tuis amicis lenis et salutifer,  
 Irae timendae, sed tamen placabilis,  
 Amore fervens idem, et irritabilis :  
 Nos servitutis justa presserunt mala,  
 Meritasque poenas dedimus impii impiis,  
 Qui, te relicto Rege, patrono, Deo,  
 Rerum parente, fonteque perennis boni,  
 Ad saxa stultas muta fudimus preces,  
 Et vana surdis vota lignis fecimus.  
 Pudet fateri : mentis aeternae capax  
 Homo, rationis particeps, mentis inopes  
 Truncos adorat, thura vivus mortuo  
 Praebet, suumque metuit artifex opus.  
 Ergo relictis, qui reliquimus, sumus :  
 Poenas subacti dedimus, et fracti malis :  
 Quum nunc Idume, nunc Palestinae manus,  
 Nunc dirus Ammon, nunc Syrus contaminat  
 Haereditatem gentis et sortem tuae.

Malo eruditi, et hostium ludibrio  
Tandem coacti, vix reversi ad te sumus.  
At tu benignus atque misericors Deus,  
Justi furoris frena compescis tui :  
Iram remittis, et odii oblivisceris :  
Et abdicatos filios culpa sua,  
Restituis iterum misericordia tua.  
Defectionis ceu scelestae sit parum  
Veniam dedisse sontibus, cumulas novis  
Etiam triumphis, laudibus, victoria.  
Exutus armis hostis arcu languidus  
Abiit remisso : bellici currus fugam  
Totis morantur sparsa campis funera :  
Volucresque pascit qui superbus vincula  
Solymis parabat : contegit strages agros,  
Cruorque tumidas auget undas barbarus.  
Ergo, creator orbis, et magne arbiter,  
Memores libenter mente grata gratias  
Agimus, habemus, supplicesque victimis  
Tuas ad aras patrio litabimus  
Ritu, canentes te Deum ac patrum patrem :  
Qui per rubentis gurgites tumidos freti  
Nostris dedisti tutum iter majoribus,  
Quum, te jubente, pigra moles aequoris  
Posuit procellas, mobilis stupuit liquor  
Cursu coacto, et vitreus crystallino  
Muro pependit pontus hinc et hinc, viam  
Praebere jussus : foederis memor tui  
Placidus propitiusque accipe haec servi tui,  
Exigua quamvis, vota, grato pectore  
Tamen profecta, debitaque nuper tibi.  
Quod primum ad aedes sospiti occurret meas,  
Tuas id aras imbuet grata hostia  
Suo cruore ; tuis beneficiis licet

Par nulla possit comparari victima.  
 At tu benigne memoris animi munera  
 Interpretaris : ut fideliter tua  
 Promissa solvis, vota sic reddi tibi  
 Fideliter gaudes, potentiam exserens  
 Erga rebelles, exserens clementiam  
 Erga timentes. Vis nec ulla est altera,  
 Cui terra, coelum, pareant, et tartara.

IPHIS, JEPHTHES, SYMMACHUS, CHORUS.

PRODEO : parentis reducis ut laeta ac lubens  
 Conspectio vultus. O mihi secundum Deum  
 Genitor verende, sine frui amplexu tuo.  
 Cur, genitor, a me torva vertis lumina ?  
 JEPH. Me miserum. IPH. In hostes omen hoc vertat Deus.  
 JEPH. Utinam : sed in nos recidit. IPH. Heu quid audio ?  
 JEPH. Miserae parentem filiae miserrimum.  
 IPH. Hei mihi, tremisco : salvus est exercitus ?  
 JEPH. Est salvus. IPH. Et tu victor ? JEPH. Ita se res habet.  
 IPH. Nulloque corpus sauciatus vulnere ?  
 JEPH. Sic est. IPH. Quid ergo de profundo pectore  
 Secreta ducis ingemens suspiria ?  
 JEPH. Id scire non est tibi opus in praesentia.  
 IPH. Hei mihi, quid in te misera peccavi, pater ?  
 JEPH. Nihil : sed in te, misera, peccavit pater.  
 IPH. In me profecto, quod sciam, erratum est nihil :  
 Nec si fuisset, id tibi molestiam  
 Afferre debet. Nam parentum injurias  
 Aequo necesse est liberi ut animo ferant.  
 JEPH. Sapienter, ac ut te decet, nata, loqueris.  
 Quantoque tu sapientius loqueris, meum  
 Pectus recludis altiore vulnere.  
 IPH. Quodcunque mentem, genitor, exercet tuam,

Omitte: cunctis parta per te civibus  
Tuo dolore gaudia haud contamines,  
Tuaque amicos sine frui praesentia.

JEPH. Nobis pariet absentiam haec praesentia.

IPH. Belli pericla forte rursum te vocant.

JEPH. Discrimen armis gravius imminet domi.

IPH. Bello periculum gravius esse domi potest?

JEPH. Bello salutem repperi, perii domi.

IPH. Imo et familia salva per te et patria est.

JEPH. Est: gratiamque debeo hoc nomine Deo.

IPH. Ac nomine isto semper utinam debeas.

JEPH. Sed vereor, ista ut salva persistant diu.

IPH. Quare secundae nunc, pater, quum maxime

Res sunt, precari votaue decet solvere:

Non quum reflavit sortis aura mobilis,

Palpare numen precibus, in re-prospira

Obliviosa sacra negligentia

Deserere. Facilem quisquis incolumis Deum

Sibi demereri studuit, ubi res ingruit

Adversa, nixus conscientiae bonae

Fructu, rogare numen audet propitium

Jam sponte, vota nuncupat securius,

Et certiore spe futura concipit.

JEPH. Jamdudum id ipsum facere mecum cogito.

IPH. Quid te moratur? JEPH. Haec relinque, filia,

Curanda nobis: quod puellares decet

Animos et annos id tuae curae puta.

IPH. Non mihi alienum est quicquid ad patrem attinet.

JEPH. Fateor: sed interim ut domi recte omnia

Sint, provide, et morem patri tuo gere.

Huc rursus ad nos post brevi revertere.

Adesse oportet te sacrificio statim.

IPH. Fiet, revertor. Heu misera, quidnam patri

Mutavit animum pristinum erga liberos?

Hoc nemo nuper fuerat indulgentior,  
Nec liberorum quisquam amantior parens ;  
Qui nunc severus, tetricus, tristis, ferox,  
Vultu minaci bellicum prae se ferens  
Adhuc tumultum : quicquid est, metuo nimis :  
Id assequi unum nequeo, quod propter me ait  
Sese dolere, nullius quae conscia  
Culpa mihi sim, qua parentem offenderim.  
O foeminarum sorte vulgus aspera  
Productum in auras, quas, licet culpa vacent,  
Rumor malignus dente rodit invido.  
Pro facto habetur quicquid ira finxerit  
Servi loquacis, quod maritus suspicax  
Commentus ipse est, malevola aut vicinia.  
Quid suspicetur genitor, in mea manu  
Non est : remedium id arbitror tutissimum,  
Intaminata conscientia frui.

SYM. Probe loquuta es, digna patre filia  
Victore, casta digna matre et patria.  
Humana quamvis finxerit malignitas  
Crimen, repostos perspicit sensus Deus,  
Illoque vincit purus animus iudice.  
Speranda ab illo et expetenda praemia  
Vitae peractae : patris autem injuria  
Aequi ac iniqui perferenda est liberis.  
Proinde patri morigera domum interim  
Revise. Si quid fama divulgaverit,  
Hic aucupabor, persequens vestigia  
Tui parentis : mox tibi indicavero.

CH. Quin hoc amice pergis agere Symmache ?

SYM. Id diligenter fiet. CH. At, quantum potes,  
Isto puellam libera trepidam metu.  
Hoc possit abs te jus amicitiae vetus,  
Quae culta primis usque ab incunabulis

Fidei tenore semper uno perstitit :  
Hoc possit ipsa patria, quae Jephthae suam  
Debet salutem. SYM. Quin tace, ac fidei meae  
Permitte. CH. At illud callide ut fiat, vide,  
Animique caecos penitus excutias sinus.  
SYM. Ne metue, nec me poterit ille, nec volet  
Celare sensus : apta novi tempora.

## C H O R U S.

I FELIX, pede fausto :  
Et qui pectoris imo  
Cernit clausa recessu,  
Idem testis et aequus  
Judex coepta secundet.  
At te, pessime livor,  
Audax nectere fraudes,  
Et committere ficto  
Dulces crimine amicos,  
Et rumore maligno  
Sanctae foedera taedae  
Praeceptis solvere, caros  
Qui gaudes sua patres  
Contra pignora caeco  
Linguae armare veneno,  
Idem testis et idem  
Secreti arbiter aequus  
Te clausum tenebroso  
Antris abdat averni,  
Unde has nec vaga sedes  
Unquam fama revisat.  
O quantum ille laborum  
Tecum detrahet una !  
Quam mortalia diris  
Curis pectora solvet !

## SYMMACHUS, JEPHTHES, CHORUS.

QUIDNAM repente, ductor armis inclyte,  
 Mutavit oris pristinum statum tui?  
 Quae moestitudo laeta turbat gaudia?  
 Metus recessit, perduelles perfidi  
 Poenas luerunt, parta patriae quies.  
 Quum gratuletur civitas victoriam  
 Tibi, tuumque patria nomen laudibus  
 In astra tollat, cantibus festis fremens,  
 Qui publici auctor gaudii es, non publicae  
 Felicitatis esse debes particeps?

JEPH. O grata sortis infimae securitas?  
 Felice natum sidere illum existimo,  
 Procul tumultu qui remotus exigit  
 Ignotus aevum tuta per silentia.

SYM. At ego beatum potius illum duxero,  
 Cui vera virtus peperit aeternum decus:  
 Quem de tenebris erutum popularibus  
 Splendore, vulgo et separatum a deside,  
 Gloria futuris merita seclis consecrat.  
 At qui sopori deditus et ignaviae est,  
 Et vitam inertem pecudis instar transigit,  
 Nil interesse opinor, an sit mortuus,  
 An morte vitam obscuriorem duxerit,  
 Quum par utrumque supprimat silentium.  
 Quapropter in te cuncta quum congesserit  
 Quaecunque amicum numen homini dare potest,  
 Laudes, honores, rem, decus, victoriam,  
 Benignitatem agnosce gratus numinis,  
 Nec sordidis sententiis res splendidas  
 Corrumpe: quum nil possit esse gratius  
 Deo, beneficii quam memor animus dati.

JEPH. Praeclara dictu res honor, victoria,

Decus, triumphus, parta bello gloria :  
At quae videntur fronte prima suavia,  
Eadem intueri propius, et intelliges  
Condita fellis acri amaritudine.  
Fortuna nulli sic refulsit prospera,  
Adversa ut illam lance non penset pari :  
Tristia secundis, et secunda tristibus  
Vicissitudo acerba sortis temperat.  
Putas beatum me, beatitudinem  
Fulgore inani metiens, et plausibus  
Vulgi, miseriae quem premunt certissimae.  
SYM. Quin finge sortem benevolam ex sententia  
Tibi polliceri cuncta : quid superest adhuc  
Quod concupiscas? Spretus, exul, patria  
Domo repulsus, inque solitudinem  
Detrusus altam, pauperis dominus casae,  
Repente veluti somnio dives, tamen  
Felicitatis arbiter iniquus tuae  
Conquereris. Altam ferre si sortem nequis,  
Pusillus animi es, sin nequis agnoscere  
Benignitatem numinis, dignissimus  
Rebus relictis pristinoque es tugurio.  
Per ferrum et ignes regna mortales petunt :  
Tibi nec petenti principatus contigit.  
Suo cruore plurimi victoriam  
Redimunt, suorum caede, damno publico :  
Quam tu incruento Marte, salvo exercitu,  
Incolumis ipse rettulisti, patriae  
Auctor salutis, hostium terror, inopi  
De sorte dives, liber e servo : modo  
Ignobilis, nunc clarus altum vertice  
Pulsas olympum gloria : media modo  
E plebe populi principem locum tenes.  
Ad absolutam nil beatitudinem

Deest parte ab omni, praeter animum muneris  
Tanti capacem, et prosperis rebus parem.

JEPH. Ut video, amice, publicus te error tenet :

At mentis oculis limpide si cerneres

Quam magna magnis sint malis obnoxia,

Tantopere quem nunc laude prosequeris statum

Rerum mearum, diceris miserrimum.

SYM. Non pene vitio semper id nostro evenit,

Et inquietae mentis inconstantia,

Neutram ut feramus lance sortem acquabili ?

Tranquillitatem pauperis laudat casae

Dives, nec alta classico silentia

Turbata, somnos liberos insomniis,

Curis vigilias : pauper aurum, purpuram,

Servos, clientes, apparatus regios,

Aedesque laxas fine nullo laudibus

Tollit, beatos divites solos putat.

Sed rem suapte expende utramque examine :

Sors neutra pura est omnibus molestiis.

Inopes egestas angit, opulentos metus :

Diti est voluptas, pauperi securitas.

Acerba lactis sors utrinque miscuit :

Sed illa certe existimanda est optima,

Quae multa paucis laeta condit tristibus,

Divina qualem tibi dedit clementia,

Cumulatam honore, laude, re, victoria :

Quam abnuere, stulti est ; perfidi, haud agnoscere ;

Nescire modice ferre, vix reor viri.

JEPH. Frustra mederi pharmacis vulgaribus

Conare nostro vulnere : sanabilis

Haec plaga non est, intimis vitalibus

Insedit, alte in viva penetrans viscera :

Eoque luctus est acerbior meus,

Quod culpa damnum, miseria errorem gravat.

SYM. Quin apud amicum quicquid est edissere,  
Fidisque ne vereare credere auribus.

JEPH. Ecquid memoria te subit voti mei?

SYM. Quod nempe salvo es pollicitus exercitu?

JEPH. Rem loqueris ipsam: quod utinam prudentior  
Voto fuissem nuncupando et cautior.

SYM. Quis hic sit error, comminisci non queo.

JEPH. Qui me meamque perditurus est domum.

SYM. Oblata poterit perdere omnes victima?

JEPH. Quae sola generis supererat spes filia.

SYM. Hanc immolabis? quae jubet necessitas?

JEPH. Quod prima nobis obvia redeuntibus.

SYM. Quod tandem in hac re nata commisit scelus?

JEPH. Promissa certam vota postulant fidem.

SYM. Hic scrupus animum scilicet premit tuum?

JEPH. Premit, nec avelli ante pectori meo

Poterit, nefanda quam cruentus victima

Miser ubi miseros perditus perdam meos,

Illisque justas ac mihi poenas luam.

At tu corusci Rex vibrator fulminis,

Quem contremiscunt terra, coelum, tartarus,

Si quando jussis obsequens promte tuis

Gratum quod esset dixerimve aut fecerim,

Audi precantem, et vota dexter adjuva:

Non nunc superbas postulo victorias,

Festosque plausus: redde rursum praelia:

Crudelis in me victor Ammon irruat,

Et noxiam animam mille plagis exigat.

CH. Heu mutatio subitae sortis!

Ut perpetua serie laetum

Nil mortalibus usque relictum est!

JEPH. Aut tu trisulcis dividens coelum ignibus,

In me scelestum parricidam et impium

Molire telum flammeo actum turbine:

Jam nunc nocentem; et, si supersit amplius  
Vitae, futurum noxium in dies magis,  
Detrude vivum sub profunda tartara.

SYM. Non transigenda temere res est tam gravis,  
Turbata caeco dum tumultu mens furit.  
Compone tete : quum quiescet impetus,  
Et liber animus sana consilia audiet,  
Una cum amicis cuncta statues libere.

JEPH. Consilia dubiis remedium rebus ferunt.  
Qui consulit, quum nullus auxilio est locus,  
Addit miseriis sponte stultitiam suis.

SYM. Remedia semper integra re suppetunt.

JEPH. Nempe medicinam quum modus patitur mali.

SYM. Si fors initio res videtur ardua,  
Non est quod animum protinus despondeas,

Quin consulendum censeo vel eo magis.

Quod saepe visum est uni inexplicabile,

Expedit alius facile : si cedant bene

Consulta prave, te sequetur gloria :

Si male ceciderint, tu tamen culpa vacas.

Auctore magno desipere, pene sapere est.

Quod si undiquaque claudit omnes exitus

Invicta vis, aut fatum ineluctabile,

Nec explicare consilia sese queunt,

Idem probabunt, quicquid eveniet, quibus

Usus fuisti in consulendo auctoribus :

Sin ipse reliquis facinus insciis novum

Perages, rogatus qui probaturus fuit,

Eventa primus arguet : quanquam sciat

Remedia nulla, scisse vult credi tamen.

CH. Ne commonentem recta sperne, nam fere  
Temere patrati poenitentia est comes.

## C H O R U S.

QUANQUAM tristia, quanquam ingrata  
Referam, et luctus luctibus addam,  
Stat sententia promere cuncta  
Ordine matri, miserae et gnatae,  
Aut consilio forte, aut precibus  
Fatum avertere triste licebit.  
Subit interea communi hominum  
Sorti impendere lacrymas: primum  
Quid deplem? miserum an patrem?  
Quem sic valida compede vinctum  
Consilii exsors detinet error,  
Ut sola putet impietate  
Se pietatem posse tueri.  
Miserae an doleam fata puellae?  
Quam vernantem primo aetatis  
Flore tenellae, spes ad opimas  
Eductam, non hostica bella  
Patria capta captam eripiunt:  
Non dira lues coelo immissa  
Perimet, patrio sed mactatu  
Victima diras imbuet aras,  
Et vice brutae pecudis, jugulo  
Calidam sanguinis evomet undam,  
Artus ferro trunca tenellos,  
Quos nec violet barbarus hostis,  
Nec montanae feritas ursae  
Crudo auderet carpere dente.  
Victore feret patre misella,  
Quae nec victore hoste tulisset.  
Vos hostilia passim campis  
Sparsa cadavera, si quis vita

D

Venit exutos sensus ad artus,  
 Gaudete, aspras cernite poenas  
 Victorem de sese exigere.  
 Haec nimirum est addita nostrae  
 Vitae sors, ut tristia laetis  
 Vicibus subeant, tenebrae ut soli,  
 Ut veri aspera bruma tepenti.  
 Nulla est adeo pura voluptas,  
 Quam non tetro felle dolores  
 Vitient : levitas perfida sortis  
 Vice saeva res hominum miscet.  
 Sic ubi placidis sternitur undis  
 Aequet tacito lene sereno,  
 Nigram glomerans turbo procellam  
 Tumidos longe cumulat fluctus :  
 Hinc remeabilis impetus aestus,  
 Illinc Cauri flabra protervi,  
 Per freta dubiam spumea puppim  
 Rapiunt : nostra haec facies vitae est,  
 Inter caedes, furta, tumultus,  
 Et graviores morte timores  
 Mortis : si quid laeti illuxit,  
 Velut arentes inter stipulas  
 Flammae evanida lux fugitivae,  
 Celeri velox avolat aura :  
 Dein perpetuis nexa catenis  
 Longi subeunt agmina luctus.

## JEPHTHES, SACERDOS.

O SOL diurnae lucis auctor, o patres,  
 O quicquid hominum sceleris immune es, procul  
 Averte vultus execrandis a sacris ;  
 Aut tu cruorem virginali innoxium

Potura tellus hisce, patulos in specus  
Sinuque vasto me vora : dum non nocens  
Perire possum, quolibet me obrue loco.  
Vel ipsum adire non recuso tartarum,  
Modo parricida tartarum non incolam.  
Quid tartarum aio ? tartarus mihi est domi.  
Quo me profusis moesta conjux lacrymis  
Rogabit ore ? nata quo intuebitur  
Moritura vultu ? colla complectens, preces  
Quas admovebit voce lamentabili ?  
SAC. Hic ultimorum consequi luctus solet  
Comes malorum, quum medentium manum  
Vulnus recusat, aut peractum quum scelus  
Remedia refugit. Tu, miser sis, an secus,  
Tua repostum est in manu : integrum tibi est  
Natum sacrifices necne ; sive (ut verius  
Dicam) integrum non est : nisi si quis miser  
Sponte esse cupiat : integrum quomodo tibi est  
Id perpetrare, sacra quod vetat parens  
Natura ? pietas cui reluctatur ? Deus  
Quod abominatur ? Primum, amare liberos  
Natura nostris inseruit affectibus :  
Nec nostra tantum motus iste pectora  
Percellit : altum quicquid aequor permeat  
Celeri natatu, quicquid alis aëra  
Findit, quod utero cunque cunctorum parens  
Tellus creavit, sentit affectus sacros.  
Nam patris hanc aeterna providentia  
Coelestis animis indidit mortalium  
Ad educandos utilem vim liberos,  
Et continendam publicam concordiam  
Orbis, recentemque sobolis propaginem  
Semper novandam : quoque nomen arctius  
Imprimeret istud mentibus, dici pater,

Et esse voluit : nec modo exemplo sui,  
 Sed et ferarum, et alitum, atque piscium,  
 Patriae probavit caritatis vinculum.  
 Nos, quibus (ut hominis serviamus nomini)  
 Peculiaris debet esse humanitas,  
 Longe a ferarum vincimur clementia.  
 Nec scelere nostras inquinare dexteras  
 Sat est : nefandum facinus adscribere juvat  
 Coelo : cruentis victimis confingimus  
 Gaudere numen : quod nec Aegyptus Dei  
 Ignara patrat, nec superstitionibus  
 Assyria falsis una deditissima.

Quam caede puras nos manus est aequius  
 Servare, puris e parentibus satos,  
 Et pura caste sacra jussos numini  
 Offerre? Nostro non litatur victimis  
 Deo cruentis, bubulove sanguine :  
 Polluta nullo corda sed contagio,  
 Et mens recocta veritate simplice  
 Illi offerenda, et casta conscientia.

JEPH. Cur ergo leges victimas sacrae imperant ?

SAC. Non quod bidentis caede gaudeat Deus,  
 Famemve caesi carnibus vituli expleat :  
 Sed audientes esse nos monitis jubet.

JEPH. Non nuncupata vota oportet reddere ?

SAC. Sed nuncupare justa tantum lex jubet.

JEPH. Istud fuisset rectius ab exordio,  
 Id polliceri quod probant ritus patrum :  
 Nunc re peracta, quod semel votum est Deo,  
 Lex missa coelo nos jubet dependere.

SAC. Mactare natos quae parentes lex jubet ?

JEPH. Quae vota jussit nuncupata reddere.

SAC. Fasne est vovere quod nefas est reddere ?

JEPH. Quinimo summum est, vota non solvere, nefas.

SAC. Quid si cremare jura vovisses patrum ?

JEPH. Nemo ista sanus vota nuncupaverit.

SAC. Cur ? nonne sacris quod repugnet legibus ?

JEPH. Sic est. SAC. Quid ergo, qui trucidat liberos ?

JEPH. Non tam quid agitur interest, quam cur agas.

SAC. Parere jussis tibi videtur numinis ?

JEPH. Mactare natum jussit Abramum Deus.

SAC. Qui jussit, idem quoque vetuit occidere.

JEPH. Cur ergo jussit ? SAC. Ut probaretur fides

Seculis futuris. JEPH. Cur vetuit ? SAC. Ostendere

Vel hinc volebat, victima obedientiam

Magis placere. JEPH. Nempe sacro numini

Parere oportet. SAC. Scilicet. JEPH. Jubet Deus

Vovere ? SAC. Sane. JEPH. Et vota solvi postulat ?

SAC. Sic est. JEPH. Morantes increpat, et a perfidis

Poenas reposcit ? SAC. Nihil habes hic quo tuum

Possis tueri facinus : infandum scelus

Qui perpetrare spondet, ultro affectibus

Stultis suisque paret ille insomniis.

Proinde voti quicquid illud est, Deum

Crudelitati desine adscribere tuae :

Nec qui scelestos odit, et nefarios

Ritus sacratis exsecratur legibus,

Scelere, quod odit, posse placari putes.

Divina vox est una, simplex veritas,

Sibique constans : quod semel jussit, ratum

Fixumque perstat tramite immutabili :

Nec ad sinistram dexteramve paullulum

Deflectere licet. Intueri unum hunc scopum

Verum est, ab una lege consilia suae

Vitae capessere : quando ceu facem Deus

Hanc esse jussit, quae per incertas vias

Errore caeco regeret instabiles gradus.

Ab hac lucerna quum procul te sentias

Flexisse temere, nunc, priusquam longius  
Abducat error, in viam rursus redi.  
Si stulta vota credis infandis sacris  
Posse expiari, falleris : crudelitas  
Ista cumulabit, non scelus tollet tuum.  
Nec falsa species decipiat animum : Deus  
Ut rite sacris gaudet oblati, ita  
Nefanda vota respuit : nec abstulit  
Impune, quamvis concitus studio pio,  
Admovit ignem qui profanum altaribus.  
Igitur amica monita ne sperne, et Deum  
Placare dum vis, concitare desine,  
Non instituto qui coli gaudet tuo,  
Sed sibi probatis lege, ritu, moribus.

JEPH. Hos, qui videntur sapere saepe plurimum,  
Vulgusque supra se imperitum venditant,  
Plerumque verae comperi prudentiae  
Minimum tenere : nemo negligentius  
Ritus vetustos servat et mysteria  
Facit minoris : vulgus indocile ac rude  
Voti tenax est, nescium fraudis : ratum,  
Quod pollicetur numini semel, putat :  
Ut nil sit aliud sapere jam, me iudice,  
Quam scire velum noxiae praetendere,  
Fucumque factis pessimis inducere.  
Quin potius illud cogitare erat aequius,  
Culpa carere, quam videri innoxios,  
Aut fraudulentæ cautionis tegmine  
Velare mentis improbae versutias.  
Pietatis ergo quisquis aemulos volet  
Suos haberi liberos, ne litteris  
Hos erudire studeat aequo impensius.  
Nam litterarum quo quis est peritior,  
Huic est sacrorum cura negligentior.

SAC. At rursus audi, si vacat, vir optime,  
Quam caeca fallat credulum ignorantia.  
Errore vulgi qui tuetur se, nihil  
(Opinor) ideo peccat excusatus.  
Nec istud unquam moribus regnum malis  
Permittat ille maximus rerum parens,  
Ut recta plebis improbae consensio  
In prava vertat, e bono ut faciat malum.  
Nec si tyrannis blandiens palpatio  
Pejora laudet, recta mutans nomina,  
Efficiet ut quae visa multitudini  
Honestae sunt, honestae fiant protinus.  
Una est honesti forma simplex, quam neque  
Vel vis tyranni, vel potentum auctoritas  
Adulterare poterit aut corrumpere.  
Nunc quo quis est e plebe ferme indoctor,  
Auctoritatem assumit arrogantius  
Dijudicandi in rebus obscurissimis:  
Et pertinaci (quod fere ignorantiae est)  
Animo tuetur dogma susceptum semel.  
Nec interim aequo expendit examine, mala  
An recta sint quae pertinaciter tenet.  
Sed quum inter omnes maxime caecutiat,  
Caecus videntes caecitatis arguit.  
Ut cui perusta febre fervent viscera,  
Amara cuncta credit, unumque autumat  
Se sapere, quum desipiat unus maxime:  
Sic vos tenebris pectus atris nubili,  
Iis imperare quaeritis, quibus aequum erat  
Parere: quorum oportuit sententiam  
Sequi, esse comites cogitis, et impingere  
In saxa, firmam sponte pellentes ratem.  
Religio vera est, veraque pietas, Deum  
Non instituto colere quod commentus es

Tibi ipse, sacris victimas non quaslibet  
Mactare, sed quas missa legum coelitus  
Decreta poscunt, et patrum mores probant.

JEPH. Quodcunque gestum est mente sincera, Deo  
Gratum est, bonique dona semper consulit  
Quaecunque corde sunt profecta simplice.

Nec numen aurum, sed animum dantis probat.

SAC. Si recta vitiat mentis improbitas malae,  
Non ideo curva stultus animus corrigit.

Nam quae vocatis recta, simplicia, proba,  
Sunt vanitatis plena dementissimae.

Nisi esse possit forte quicquam vanius  
Quam ad veritatis lumen oculos claudere.

Dein caecitatem lapsus in spontaneam,  
Titulis honestis in scelere laudem petis,  
Rerumque tollis omnium discrimina,  
Dum iniqua justa, foeda honesta mobilis  
Pendere vulgi statuis ex sententia.

Quod si potestas tanta sit sententiis  
Stultorum, ut aequa iniqua faciant protinus,  
Ut sint profana sacra, jus injuria :

Cur non et illud arbitremur posse eos,  
Ignes in undas, undam in ignes vertere,  
Mutare lignis saxa, vitam mortuis  
Revocare ? motus temporum sistant citos,  
Et sempiternas transferant rerum vices.

Quod si arbitraris haec supra mortalium  
Vires, et uni conditori obnoxia ;

Quas ille leges prodidit semel, puta  
Aequae perennes ac ratas, aut amplius,  
Nec ullum in illas esse jus mortalibus.

Nec qui supremus imminet mundo dies,  
Edicta rumpet illius : coelum et solum,  
Et aëra et aquas solvet ignis ultimus :

De lege vero, quae data est divinitus,  
 Non carpet apicem temporis longinquitas.  
 JEPH. Vos ista per me si libet sectamini,  
 Quos juvat haberi antistites prudentiae :  
 Ego veritatem malo stultam et simplicem,  
 Quam splendidam fuco impiam sapientiam.

## C H O R U S.

O ISACIDAS matrona inter  
 Rarum exemplum sortis amicae,  
 Quam subito te fortuna atrox  
 Exitio submersit, et illum  
 Prope tangentem sidera fastum  
 Obruit, atrae et more procellae  
 Luctu gaudia vertit acerbo.  
 Heu nunquam homini sat compertum  
 Quid petat aut quid vitet in horas.  
 Quis tibi nuper non invidit,  
 Dux fortissime ? cui prope supra  
 Votum acciderant prospera cuncta :  
 Clari generis splendor, casti  
 Thalami, soboles digna parente,  
 Partaque valida gloria dextra :  
 Qui nunc subitae mole ruinae  
 Obrutus, ipsis es miserandus  
 Hostibus, ac tua vota retractans  
 Imples miseris astra querelis.  
 Nempe erroris nebula, et tetrīs  
 Ignorantia septa tenebris  
 Sic humanas sepelit mentes.  
 Nec perspicuis animi quisquam  
 Oculis radios cernere potis est  
 Veri simplicis, aut virtutis

Nudae rectum insistere callem.  
Sed veluti sub luce maligna  
Per secretos nemorum anfractus  
Lubricus error mille viarum  
Dubio occursu ludit euntes,  
Inter varios semita flexus  
Nulla placet, neque displicet ulla :  
Sic iter homines praeter propter  
Dubia incerti mente vagamur.  
Hic venalem funere laurum  
Otii impatiens dum sibi quaerit,  
Luctu alieno dura per arma  
Redimit vanae murmura famae.  
Captatores alius captans  
Dulci steriles pignore lectos  
Multa pensat plebe clientum :  
Atque intenta fraude vicissim  
Corvos ludere gaudet hiantes,  
Cunarum alter murmura blanda,  
Tenero et balbas ore querelas  
Non mutaverit opibus Croesi,  
Aut quas divite lucidus unda  
Rutilus Hermus volvit arenas.  
Verum nemo tam sapienter  
Vitam instituit, consilium ut non  
Damnet decies ipse suum una  
Forsitan hora.  
Atque en prodit squalida luctu  
Miseram comitans nata parentem :  
Quam dissimiles (proh dolor!) illis  
Quae conspicuae puper cunctis,  
Laetaeque novi laude triumphi,  
Pene attigerant vertice olympum :  
Nuper ad invidiam usque beatae,

Nunc exemplum nobile sortis  
 Variae. Sic Deus humana rotat,  
 Instar volucris pulveris acti  
 Turbine celeri mobilis aurae:  
 Aut hibernae more procellae,  
 Quae violenti flamine Cauri  
 Obruit altos grandine montes,  
 Mox ubi roseo fulsit ab ortu  
 Fax perspicui pura diei,  
 Late albentes fusa per agros  
 Vix conspecto sole liquescit.

## STORGE, JEPHTHES, IPHIS.

O spes inanes: festa nuptialia  
 Tibi parabam, nata; lucem cernere  
 Illam expetebam, sorte quum te prospera  
 Auctam viderem liberis, et conjuge  
 Claro beatam: te senectutis meae  
 Fore pollicebar column ac solatium:  
 De te augurabar falsa frustra insomnia.  
 Nunc me insolenti saeviens ludibrio  
 Sortis furentis impotens immanitas  
 Felicitatis de supremo culmine  
 Dejecit, uno cuncta vertens impetu.  
 O ter beatos, liberis quos hosticus  
 Orbavit ensis, pestilens aut aëris  
 Lues, famesve: scelere quorum lacrymae  
 Carent, doloremque imputare aliis queunt:  
 At hic in uno scelere sexcenta scelera  
 Fortuna miscet: liberorum carnifex  
 Parens, scelestas sacra, ritu barbaro  
 Arae cruentae victimis nefariis.  
 Si sancta sancte sacra tantum numini

Credis probari, tolle morem barbarum :

Crudelitate sin propitius sit Deus,

Et me trucida victimam cum filia.

JEPH. Acerbitatis plus satis complectitur

Sors nostra per se, nihil ut accedat mali.

Quamobrem omitte meque teque incendere.

Nil profuturis luctui conviciis.

Nam saeva quamvis sit calamitas omnium,

Sors nostra multo caeteris est saevior.

Conjuncta vestris innocentia est malis,

Et labe sceleris miseria infelix caret.

Ego nec scelestus esse queo, ni sim miser,

Nec calamitosus sceleris expers degere :

Solusque cogor facere facinus et pati.

ST. Nempe ipse tete sponte cogis et volens.

JEPH. Utinam ista nostri vota sint arbitrii,

Promissa nec sit abnegare nefarium.

ST. Scelesti vota grata non sunt numini.

JEPH. Fuisse grata testis est victoria.

ST. Quid ? polliceri quod tuum non est potes ?

JEPH. Mea nata non est ? ST. Est : sed etiam ut sit mea.

Commune pignus quum sit, uni cur patri

Mactare, vitam mihi tueri non licet ?

Quod si liceret liberos addicere.

Parentis alterius libidini, et impio

Dirimere amoris vinculum divortio,

Plus jure matri parte cederet sua,

Matri, salutis quae sit auctor, quae patri

Jam sponte natam perdituro subtrahit.

Quid ? nuptiales si pararentur faces,

Virumque legeret filiae suae pater,

Non hic parentis utriusque arbitrium

Commune pariter liberis incumberet ?

At haec societas impotens et arrogans

Est conjugalis copulae consortium,  
Servare matri non licere, perdere  
Licere patri, si modo quis perdidit  
Hanc quam trucidat, cujus astans funeri  
Immanitatis gloriatur ambitu :  
Qui, claustra dum revellit animae, dum latus  
Mucrone saevo reserat, et vitalibus  
Haurit morantem sub profundis spiritum,  
Cupit videri, non eget solatio :  
Famam aucupatur liberorum e sanguine, et  
Compensat aura sanctimoniae scelus,  
Seseque jactat laude parricidii.  
Tu, si parentis exuisti in liberos  
Mentem, furenti percitus vecordia,  
Permitte saltem matris indulgentiae  
Amare, non amare quod summum est scelus;  
Servare, summum quod nefas est perdere :  
Quod prodidisse sponte, parricidio  
Est gravius omni; quod trucidare propria  
Manu, ferarum immanius truculentia est.  
Si dividendum pignus esset mutui  
Amoris, aequa lege non divisimus :  
Ut tu uti, abuti, morte, vita filiae  
Possis, redundant ad genitricem modo  
Luctus, dolores, lacrymae, suspiria.  
O rupe dura durior, vel robore  
Prognate crudo, cotibus vel asperis  
Inter ferarum lustra, nec generis tenens  
Nostri nec ulla sanguinis vestigia!  
Num flente nata, lacrymante conjuge,  
Moestis propinquis liberorum carnifex  
Ullum doloris indicem gemitum dedit ?  
Quin ad paternos, nata, procidis pedes ?  
Oratione si quid aut lacrymis potes,  
Cor flecte durum, frange mentem ferream.

IPH. Miserere, genitor, te per hanc rogo manum  
 Voti potentem, compotem victoriae :  
 Per si quid unquam merita sum de te bene :  
 Si quando parvis comprimens te brachiis,  
 Onus pependi dulce de collo tuo :  
 Per si quid ex me tibi voluptatis fuit,  
 Depone mentem liberos erga truce[m],  
 Et diritatis hujus obliviscere.

Aut si quid in te ex parte peccatum est mea,  
 Profer, quod instat cunque levius perferam,  
 Si luere poenas jure me cognovero.

Quid ora vertis? misera quod feci nefas  
 Cur esse patri debeam execrabilis,  
 Ut contueri non queat vultus meos?

JEPH. Nil, nata, per te perpetratum est : hoc meum  
 Nefas : meum istud est scelus totum : meae

Immerita poenas pendis imprudentiae.  
 Ego teque meque, misera, perdidici miser  
 Votis nefandis : quod utinam prudentior  
 Verbis fuissem, aut praelio infelicior :  
 Et morte honesta tot virorum fortium  
 Inter catervas caesus hostili manu  
 Praeoccupassem miseriae portum meae.  
 Ingrata nunc me vita mihi superstitem,  
 Luctus, reservat, semper ut videam novos.  
 Tibi per nefanda sacra juro, quae Deo  
 Renuente vovi, per mali cumulum mei,  
 Et luctuosam memoriam cladis tuae,  
 Si morte redimi mors vicaria queat,  
 Vitam libenter, filia, tibi impenderem.  
 Ecquid beatus videor esse vos supra?

IPH. Aequae atque nos, aut amplius etiam miser.

ST. Apud parentem quando levis auctoritas  
 Est hujus, unum conjugem conjux rogo,  
 Atque id supremum, me mori pariter jube.

Mortem imputare, si me amas, potes mihi;  
Sin oderis, tibi: doloribus exime  
Me morte, teque libera molestiis.

JEPH. Patratur una caede sceleris plus satis.

ST. O sanctitas, o fas, et innocentia!

Peccare metuit immolator filiae.

IEPH. Omitte mater lacrymas carissima,

Omitte questus, jurgia et convicia.

Et tu, pater, quae pectus anxium premit,

Depone curam: nec meam propter necem

Utro citroque verba commutaveris.

Quod non volentem dura te necessitas

Isthuc coëgit, multa mihi faciunt fidem:

Moestitia praesens, pristina indulgentia;

Et nullius mens criminis mihi conscia,

Cur commereri debeam mortem a patre.

Quapropter istud quicquid est, necessitas

Quod cogit, ultro non recuso perpeti;

Et quam parenti patriaeque debeo

Animam, libenter reddo: et illud ultimum,

Nil postulatura, genitrix, posthac rogo,

Ne quid patri caussa mea succenseas,

Neu sis molesta: mortuis si quis super

Sensus sepultis est eorum quae gerunt

Vivi, futurum crede manibus meis,

Ut si quid aliud, id quidem gratissimum,

Si vos beatos, prospereque degere

Sim certa vitam; nec parentes ad meos

Officia vitae mutua quibus debeo.

Reddere vicissim, et educandi solvere

Pretium, senectae infirmitatem sustinens,

Ex me redundet luctus atque acerbitas.

ST. Utinam (precari si pie et sancte id licet)

Dominetur Ammon, pristinum ferat jugum

Judaea: quamvis serva, certe viveres,

IPH. Miserere, genitor, te per hanc rogo manum  
 Voti potentem, compotem victoriae :  
 Per si quid unquam merita sum de te bene :  
 Si quando parvis comprimens te brachiis,  
 Onus pependi dulce de collo tuo :  
 Per si quid ex me tibi voluptatis fuit,  
 Depone mentem liberos erga truce[m],  
 Et diritatis hujus obliviscere.

Aut si quid in te ex parte peccatum est mea,  
 Profer, quod instat cunque levius perferam,  
 Si luere poenas jure me cognovero.

Quid ora vertis? misera quod feci nefas  
 Cur esse patri debeam execrabilis,  
 Ut contueri non queat vultus meos?

JEPH. Nil, nata, per te perpetratum est : hoc meum  
 Nefas : meum istud est scelus totum : meae  
 Immerita poenas pendis imprudentiae.

Ego teque meque, misera, perdidi miser  
 Votis nefandis : quod utinam prudentior  
 Verbis fuisset, aut praelio infelicior :  
 Et morte honesta tot virorum fortium  
 Inter catervas caesus hostili manu  
 Praeoccupassem miseriae portum meae.  
 Ingrata nunc me vita mihi superstitem,  
 Luctus, reservat, semper ut videam novos.  
 Tibi per nefanda sacra juro, quae Deo  
 Renuente vovi, per mali cumulum mei,  
 Et luctuosam memoriam cladis tuae,  
 Si morte redimi mors vicaria queat,  
 Vitam libenter, filia, tibi impenderem.  
 Ecquid beatus videor esse vos supra?

IPH. Aequae atque nos, aut amplius etiam miser.

ST. Apud parentem quando levis auctoritas  
 Est hujus, unum conjugem conjux rogo,  
 Atque id supremum, me mori pariter jube.

Mortem imputare, si me amas, potes mihi;  
Sin oderis, tibi: doloribus exime  
Me morte, teque libera molestiis.

JEPH. Patratur una caede sceleris plus satis.

ST. O sanctitas, o fas, et innocentia!

Peccare metuit immolator filiae.

JEH. Omitte mater lacrymas carissima,  
Omitte questus, jurgia et convicia.

Et tu, pater, quae pectus anxium premit,  
Depone curam: nec meam propter necem  
Ultro citroque verba commutaveris.

Quod non volentem dura te necessitas  
Isthuc coëgit, multa mihi faciunt fidem:  
Moestitia praesens, pristina indulgentia;  
Et nullius mens criminis mihi conscia,  
Cur commereri debeam mortem a patre.  
Quapropter istud quicquid est, necessitas  
Quod cogit, ultro non recuso perpeti;  
Et quam parenti patriaeque debeo  
Animam, libenter reddo: et illud ultimum,  
Nil postulatura, genitrix, posthac rogo,  
Ne quid patri caussa mea succenseas,  
Neu sis molesta: mortuis si quis super  
Sensus sepultis est eorum quae gerunt  
Vivi, futurum crede manibus meis,  
Ut si quid aliud, id quidem gratissimum,  
Si vos beatos, prospereque degere  
Sim certa vitam; nec parentes ad meos  
Officia vitae mutua quibus debeo.  
Reddere vicissim, et educandi solvere  
Pretium, senectae infirmitatem sustinens,  
Ex me redundet luctus atque acerbitas.  
ST. Utinam (precari si pie et sancte id licet)  
Dominetur Ammon, pristinum ferat jugum  
Judaea: quamvis serva, certe viveres,

Aut morte saltem non nefanda occumberes :

Saevisset in nos levius insolentia

Hostis furentis quam patris victoria.

Novaque fati sed miserrima vice,

Servire votum est, et calamitas vincere.

O semper in nos vel favens etiamnum atrox

Fortuna, quantis gaudii usuram brevem

Luctus acerbi foenerasti lacrymis !

IPH. Quin potius illi justa supplicia luant :

Nos, si necesse est, immerentes sanguine

Aras piemus, totque caedes hostium

Pensemus una sponte gratique hostia.

JEPH. Heu nata, nunc intelligo demum miser

Quam foeda, saeva, dira designaverim,

Qui prole tali temere meme orbaverim.

Sed ipse de me sponte poenas exigam.

Te namque iniquum est dare meae dementiae

Poenas, puellam innoxiam, superstite

Auctore luctus : ipse stultitiae meae

Supplicia pendam ; nec mihi exprobrabitur

Ab invida vicinia, quod ultima

Sub spatia vitae parricida filiae

Mihi peperci, liberumque sanguine

Vili redemi turpis auram gloriae.

At tu beata hac caritate in patriam

Patremque vive, cujus aetas dignior

Superesse : quamque gratiam nequit parens,

Persolvat ille, solus aequa qui potest

Pro dignitate huic indoli rependere.

IPH. Omitte, genitor, has moras innectere,

Meumque dictis mollibus frangere animum ;

Nec fas nec aequum te mea fungi vice :

Me vota poscunt : itaque tibi animam libens

Hanc reddo patri, reddo patriae meae.

Nec ulla Jephthae me redarguet dies

Non stirpe dignam : tolle, age, abduci jube.

Devota morti, et consecrata victima

Projeci amorem lucis : omnis est mora

Molesta : mater jam vale carissima,

Et vos penates patrii, in quibus dies

Laetos peregi, spes ad amplas molliter

Educta, claris destinata nuptiis.

O fata, fata, et morte defuncti patres,

Accipite placide destinatos patriae

Manes saluti : tuque lux novissima

Hodierna nostris haurienda oculis, vale.

## C H O R U S.

LAUS foeminei famaue sexus,

Et generosae gloria stirpis,

Animi nimium virgo virilis,

Licet injuria tibi fatorum

Utiliores abscidit annos,

Licet immanis feritas Parcae

Teneri florem carpserit aevi,

Quod tibi vitae sors detraxit,

Fama adjiciet posthuma laudi :

Et qua primis Phoebus ab Indis

Rutilae tollit lumina flammae,

Te posteritas sera loquetur.

Te, qui primi flumina Nili

Bibit, et curru qui Sarmatico

Solidum non timet ire per Istrum,

Concinet olim,

Non formidine mortis inerti

Pavidam, patriae donasse alacrem

Natura tibi quos dedit annos.

Nostris longum tu dolor et honor

Virginibus, tibi thalami expertes  
 Moesto ululatu flebile carmen  
 Per redeuntēs recinent annos.  
 At vos, vestri dedecus aevi,  
 Animam patriae reddere segnes,  
 Vos aeternis tenebrarum umbris  
 Teget oblivio longa sepultos,  
 Et generis pudor, et telluris  
 Pondus inutile, quos et praesens  
 Spernit, et altera nesciet actas.

### STORGE, NUNCIUS.


HEU misera, an omnis spes salutis occidit?  
 Effare. NUN. Res ut inter adversas quidem  
 Non pessime agitur. ST. Si quid accidit boni,  
 Ea blandientis sortis est crudelitas:  
 Venena dulci melle tetra temperat.  
 Quapropter ede quicquid occultas mali.  
 Usus dolendi longaque experientia  
 Induxit animo callum: ut amplius mihi  
 Nocere posset, nil reliquit sors sibi.  
 Parata certa est sed misera securitas.  
 NUN. Ut gesta res est ergo paucis accipe:  
 Quum staret aras ante tristes victima  
 Jam destinata virgo, purpureum decus  
 Per alba fudit ora virgineus pudor,  
 Coetus viriles intuerier insolens:  
 Ut si quis Indum purpura violet ebur,  
 Rosasve niveis misceat cum liliis.  
 Sed se per ora cum pudore fuderat  
 Perspicua certae juncta vis fiduciae,  
 Interque flentes sola fletibus carens,  
 Vultu remisso constitit firma, ac sui  
 Secura fati: quas tenebat lacrymas

Propinqua morti virgo, populus non tenet,  
Alium parentis beneficium recens movet,  
Et servitutis patriae exemptum jugum,  
Et solitudo familiae clarissimae.  
Alius acerbam sortis ingemuit vicem,  
Longoque luctu breve redemtum gaudium,  
Raroque stabilem rebus in laetis fidem.  
Florem juventae deflet ille, et siderum  
Similes ocellos, aemulamque auro comam,  
Supraque sexum pectoris constantiam.  
Et forte solito gratiorem afflaverat  
Natura honorem, ceu supremo munere  
Dignata funus nobilis viraginis.  
Ut jam ruentis aequor in Tartessium  
Phoebi recedens esse gratior solet  
Splendor, rosaeque vere supremo halitus  
Colorque cupidus detinet oculos magis :  
Sic virgo fati stans supremo in limine,  
Parata morti, nec recusans molliter,  
Turpive torpens exitus formidine,  
Commorat omnes, versaque in se lumina  
Vulgi stupentis traxerat miraculo,  
Et triste cunctis attulit silentium.  
ST. Narrare porro perge facinoris modum,  
Neu parce matris auribus : nihil potes  
Afferre triste, ut tristiora non sibi  
Proponat animus : cuncta jam praecepta sunt.  
NUN. Animi virilis tum puella lumina  
Ad clara tollens astra, concipit preces  
Ex ore casto, voce non fracta malis :  
Aeterne rerum genitor, atque hominum parens,  
Tandem propitius gentis errori tuae  
Ignosce, et istam victimam lenis cape,  
Quod si furoris exigis piaculum,  
Quaecunque nostra contumax superbia

Supplicia meruit, te parentem deserens,  
 Utinam luatur hoc cruore : saepius  
 Utinam liceret sanguinem profundere, et  
 Hic si parentum et civium sita est salus,  
 In me furoris impetum ac irae tuae  
 Per mille mortes saepius deflectere.  
 At tu sacerdos quid metuis ? (etenim metu  
 Gelido tremebat) ades, et hanc luce exime  
 Animam : morantem solve corporis obicem :  
 Populum, parentem, meque voto libera.  
 Ut haec loquuta est, ille jamdudum parens  
 Visus cruentus, saeviorque tigride,  
 Oculos amictu lacrymis madens tegit,  
 Seseque damnans vota que temeraria.  
 Fletu sacerdos obrutus vix solvere  
 Animae meatus potuit, et moesto diu  
 Taciturna turba torpuit silentio.  
 Ut vocis autem pervium patuit iter,  
 Non ille gemitus, esse nec qualis solet  
 Fremitus doloris, atque lamentatio,  
 Sed concionis gratulantis murmure  
 Confusa turba, teque praedicantium,  
 Adversa sortis inter asprae vulnera,  
 Et blandientis laeta dona, foeminam  
 Unam beatam maxime et miserrimam.  
 Nam plaga quamvis alte ad ossa sederit,  
 Magni doloris magnum habes solatium.  
 ST. Solamen ipso luctuosius malo,  
 Quod leniendo exasperat malum vetus,  
 Luctusque acerbi memoriam semper novans,  
 Reducta cogit vulnera recrudescere.  
 Quo fortiore nata tulit animo necem,  
 Hoc angit animum tristior meum dolor.

7 AP 62

F I N I S.



11626. d. 14